

ZAKON O UVJETIMA I NAČINU OBAVLJANJA DJELATNOSTIMA REZANJA DRVETA

Sl. novine FBiH br. 91/2015

I - OPĆE ODREDBE

Član 1

Ovim zakonom utvrđuju se uvjeti i način osnivanja pilana i obavljanja djelatnosti rezanja drveta u pilanama i na ostalim nepokretnim i pokretnim uređajima za rezanje drveta (u daljnjem tekstu: pilane).

Član 2

Pilane moraju posjedovati uređenu tehničko-tehnološku dokumentaciju.

Dokumentacija iz stava 1. ovog člana sadrži naročito:

-građevinski dio, mašinsku opremu i instalacije, elektro instalacije, sanitarnu zaštitu, zaštitu od požara, zaštitu okoline, zaštitu na radu i tehnološki dio.

Za mobilne - pokretne uređaje za rezanje drveta koji nisu na električni pogon u dokumentaciji iz stava 2. ovog člana ne obrađuje se građevinski dio i elektro instalacije.

Pilane iz stava 1. ovog člana moraju prije početka obavljanja djelatnosti u građevinskom objektu za rezanje drveta pribaviti urbanističku saglasnost, odobrenje za gradnju i odobrenje za upotrebu građevine na način i po postupku kako je to utvrđeno u Zakonu o prostornom uređenju.

Pilane iz stava 1. ovog člana moraju ispunjavati i minimalne tehničko-tehnološke uvjete u pogledu poslovnih prostorija, odnosno prostora, opremljenosti uređajima i opremom i druge uvjete propisane za obavljanje registrirane djelatnosti rezanja drveta u pilanama.

Član 3

Nadležni organ uprave za poslove šumarstva i industrije kantona ili organ koga on ovlasti formira stručnu komisiju koja vrši neposredan uvid u tehničko - tehnološku dokumentaciju i izvedene radove na objektu. Komisija će sačiniti zapisnik u kojem će dati ocjenu da li je objekat izveden u skladu sa tehničko - tehnološkom dokumentacijom iz člana 2. ovog zakona.

Ukoliko objekat nije izveden u skladu sa važećim propisima, neće se pustiti u rad dok se uočeni nedostaci ne otklone.

Nadležni organ Vlade Federacije Bosne i Hercegovine će u koordinaciji sa organima kantona u čijoj je nadležnosti uređenje djelatnosti iz člana 1. ovog zakona, uskladiti ravnotežu između radnog kapaciteta svih pilana i raspoloživog sječivog etata na bazi prirodnog priraštaja visokih šuma.

Nadležni organ uprave svakog kantona ili organ koga on ovlasti, dužan je da u sklopu redovnog postupka oko izdavanja suglasnosti za obavljanje djelatnosti rezanja drveta po svakom konkretnom zahtjevu pribavi i pismeno odobrenje od strane nadležnog organa Vlade Federacije Bosne i Hercegovine.

Radi pribavljanja odobrenja iz stava 4. ovog člana nadležni organ uprave ili organ koga on ovlasti u obavezi je nadležnom organu Vlade Federacije Bosne i Hercegovine dostaviti zapisnik iz stava 1. ovog člana.

Član 4

Pilane koje su registrovane za obavljanje djelatnosti rezanja drveta dužne su u roku od 30 dana od dana stupanja na snagu ovog zakona, pribaviti uvjerenje o tehničkoj ispravnosti za obavljanje djelatnosti rezanja drveta, u skladu sa članom 2.

Član 5

Nadležni organ uprave kantona ili organ koga on ovlasti, izdaće saglasnost za obavljanje djelatnosti rezanja drveta ako su ispunjeni uvjeti iz čl. 2, 3. i 4. ovog zakona.

Nadležni organ uprave kantona ili organ koga on ovlasti, izdace rješenje za obavljanje djelatnosti rezanja drveta za novoizgrađene pilane ako su ispunjeni uvjeti iz čl. 2. i 3. ovog zakona.

Uz zahtjev za izdavanje saglasnosti iz stava 1. ovog člana, kao i za izdavanje rješenja za rad novoizgrađenih pilana iz stava 2. ovog člana, podnosilac zahtjeva dužan je dostaviti opći akt o unutrašnjoj organizaciji kojim su utvrđeni uvjeti potrebni za obavljanje posla na radnim mjestima u pilani.

Primjerak izdatog rješenja iz st. 1. i 2. dostavit će se i nadležnom organu Vlade Federacije Bosne i Hercegovine.

Član 6

U šumi ili njenoj blizini ne mogu se podizati pilane (stabilne i pokretne-mobilne), samostalne radnje i prateći objekti.

Pod blizinom šume iz stava 1. ovog člana podrazumijeva se pojas od 100 metara od ivice šume.

Član 7

Pilane mogu preuzeti drvo i vršiti rezanje samo na osnovu otpremnog iskaza za drvo posječeeno u šumi, a prema odgovarajućem propisu o sadržaju i izdavanju otpremnog iskaza za drvo.

Otpremni iskaz za drvo posječeeno u šumi u državnoj svojini izdaju preduzeća koja gazduju tim šumama, a za drvo iz šuma u privatnoj svojini, nadležni organ uprave kantona ili organ koga on ovlasti.

Pilana je dužna otpremni iskaz čuvati u svojoj arhivi najmanje tri godine.

Član 7a

Nadležni organ Vlade Federacije Bosne i Hercegovine dužan je putem nadležnih organa kantona osigurati zabranu isporuke trupaca pilanama koje ne posjeduju odobrenje za rad propisano ovim Zakonom.

Član 8

Pilane su dužne voditi evidenciju rezanja drveta.

Evidencija iz stava 1. ovog člana obavezno sadrži podatke o dnevnom i mjesečnom prorezu oblovine četinarara i listopadnog drveta.

Član 9

Rezana građa mora biti klasirana i obilježena u skladu sa važećim standardom.

Pilane pri stavljaju rezane građe u promet, izdaju otpremni iskaz koji sadrži podatke:

- naziv i sjedište firme koja izdaje otpremni iskaz,
- naziv i sjedište firme ili fizičkog lica, kojoj se isporučuje rezana građa,
- datum otpreme rezane građe i registarski broj vozila, kojim se građa otprema,
- rok važenja otpremnog iskaza,
- naziv rezane građe sa osnovnim elementima (dužina, debljina, širina, kvalitet markiran po standardu, količina po kvalitetnim klasama i ukupna količina),
- cijena po m³ i ukupna vrijednost rezane građe.

Pilana je dužna otpremni iskaz čuvati u svojoj arhivi najmanje tri godine.

Pilane su dužne dostavljati podatke o prorezu oblovine i proizvodnji rezane građe Federalnom zavodu za statistiku i nadležnom organu uprave kantona.

Član 10

Prorez pilanskih trupaca ne može se vršiti pokretnim cirkularima.

Član 11

(brisano)

Član 12

Svi strojevi i uređaji pomoću kojih se vrši rezanje drveta moraju biti jedanput u tri godine pregledani i ispitani i moraju posjedovati odgovarajuću ispravu-upotrebnu dozvolu u skladu sa odgovarajućim propisom o načinu i postupku vršenja periodičnih pregleda i ispitivanja iz oblasti zaštite na radu. U protivnom zabranjuje se rad sa strojevima i uređajima.

Član 13

Svi prenosivi strojevi za prorezivanje trupaca kao i drugi prenosivi strojevi i uređaji, nakon promjene lokacije moraju se ponovo periodično ispitati i za njih se mora pribaviti nova odgovarajuća ispravu-upotrebna dozvola, u skladu sa odgovarajućim propisom o načinu i postupku vršenja periodičnih pregleda i ispitivanja iz oblasti zaštite na radu. U protivnom se zabranjuje rad sa prenosivim strojevima i uređajima.

II - NADZOR

Član 14

Nadzor nad sprovođenjem ovog zakona vrše federalni i kantonalni organi uprave nadležni za poslove šumarske inspekcije (čl. 6, 7 i 8), tržišne inspekcije (čl. 3, 4, 8 i 9), inspekcije rada (čl. 2, 3 i 4. i Član 5. stav 3. i čl. 10, 11,

12. i 13), protivpožarne inspekcije (čl. 2, 3 i 4), sanitarne inspekcije (čl. 2, 3 i 4), elektroenergetske inspekcije (čl. 2,3 i 4), urbanističko-građevinske inspekcije (čl. 2, 3 i 4), svako u okviru svoje nadležnosti.

III - KAZNE NE ODREDBE

Član 15

Novčanom kaznom od 5.000,00 do 50.000,00 KM kaznit će se za prekršaj preduzeća i druga pravna lica koja gazduju šumama preduzeća i druga pravna lica koja obavljaju djelatnost rezanja i prometa drveta, ako:

1. ne posjeduju urednu tehničko - tehnološku dokumentaciju (Član 2. st. 1. i 2.),
2. obavljaju djelatnost rezanja drveta bez saglasnosti za obavljanje rezanja drveta (Član 5. stav 1.),
3. ne posjeduju rješenje za obavljanje djelatnosti rezanja drveta (Član 5. stav 2.),
4. podižu pilane i prateće objekte u šumi ili njenoj blizini (Član 6.)
5. ne posjeduju otpremni iskaz za drvo posječeno u šumi i ne čuvaju ga u svojoj arhivi (Član 7.),
6. ne vode ili nepropisno vode evidenciju rezanja drveta (Član 8.),
7. ne izdaju ili izdaju nepotpun ili netačan otpremni iskaz za rezanu građu (Član 9.),
8. vrše promet ili prevoz rezane građe bez otpremnog iskaza (Član 9.),
9. ne dostavljaju, dostavljaju neblagovremeno ili dostavljaju netačne podatke o prorezu drveta i proizvodnji rezane građe (Član 9. stav 4.)
10. ako prorez pilanskih trupaca vrše pokretnim cirkularima (član 10.)
11. Drže neprijavljenje i neosigurane radnike.

Za prekršaj iz stava 1. ovog člana kaznit će se i odgovorno lice, novčanom kaznom od 500,00 do 5.000,00 KM. Za prekršaje iz čl. 12. i 13. primjenjivat će se kaznene odredbe iz Zakona o zaštiti na radu.

Predmeti na kojima je izvršen prekršaj iz člana 13. ovog zakona kao i predmeti koji su poslužili za izvršenje prekršaja iz stava 1. ovog člana, oduzimaju se.

Za prekršaje iz ovog člana, uključujući i prekršaje iz člana 13., pored propisane novčane kazne osobi koja čini prekršaj onemogućava se dobivanje dozvole u razdoblju od 2 godine na poslovima rezanja drveta.

Član 16

(brisan)

IV - PRELAZNE I ZAVRŠNE ODREDBE

Član 17

(brisan)

Član 18

Preduzeća i druga pravna lica koja se bave preradom drveta, samostalni privrednici-poduzetnici i druga lica koja obavljaju djelatnost rezanja drveta, kao i lica koja se bave prometom drveta, dužna su uskladiti svoje poslovanje i opće akte sa odredbama ovog zakona u roku od 30 dana od dana stupanja na snagu ovog zakona.

Član 19

Danom stupanja na snagu ovog zakona prestaje primjena propisa o uvjetima i načinu obavljanja djelatnosti rezanja drveta, koji su se primjenjivali na teritoriji Federacije Bosne i Hercegovine do dana stupanja na snagu ovog zakona.

Član 20

Ovaj zakon stupa na snagu narednog dana od dana objavljivanja u "Službenim novinama Federacije BiH".

**Samostalni članovi Zakona o izmjenama i dopunama
Zakona o uvjetima i načinu obavljanja djelatnosti rezanja drveta**

("Sl. novine FBiH", br. 25/2006)

Član 12

Pravilnik o minimalnim tehničko-tehnološkim i drugim uvjetima za obavljanje djelatnosti rezanja drveta u pilanama iz člana 2. ovog Zakona donosi Federalni ministar energije, rudarstva i industrije u roku od 60 dana.

Član 13

U članu 3. st. 1., 2. i 3.; članu 5. st. 1. i 2.; članu 7. stav 2.; članu 9. stavu 4. i članu 14. riječ "županija" briše se u različitim padežima.

Član 14

Ovaj Zakon stupa na snagu osmog dana od dana objavljivanja u "Službenim novinama Federacije BiH".